

24. oktober 2007

UKA 2007/49

Unammilleqatigiinneq pillugu inatsisissatut siunnersuut

pillugu

Inatsisartut Inuussutissarsiornermut Ataatsimiititaliaata

ISUMALIUTISSIISUTAA

Siunnersuutip aappassaaneerneqarnerani saqqummiunneqartoq

Inatsisartut Inuussutissarsiornermut Ataatsimiititaliaat suliarinninnermini ukuningga inuttaqarpoq:

Inatsisartunut ilaasortaq Emilie Olsen, Atassut (siulittaasup tullia)
Inatsisartunut ilaasortaq Vittus Mikaelson, Siumut
Inatsisartunut ilaasortaq Esmar Bergstrøm, Inuit Ataqtigiit
Inatsisartunut ilaasortaq Doris Jakobsen, Siumut (sinniisussaq)
Inatsisartunut ilaasortaq Lene Knüppel, Demokraatit (sinniisussaq)

Siunnersuutip UKA 2007-imi siullermeerneqarnera tunngavigalugu inatsisissatut siunnersuut, inatsimmut nassuiaatit tusarniaanermillu atortut Inatsisartut Inuussutissarsiornermut Ataatsimiititaliaata misissorpai. Siunnersuutip aappassaaneerneqarnissaanut ilusiliinikkut annikinnerusumik iluarsiinertalimmik allannguutissatut siunnersuummik Naalakkersuisut saqqummiussilersaartut ataatsimiititaliap maluginiarpaa. Allannguutissatut siunnersuut taanna apeqqutaatillugu isumaliutissiissummi matumani isummersuutini ataatsimiititaliap saqqummiuppai.

Tusarniaaneq.

Siunnersuut piffissami 2007-imi 24. aprilimit 15. majimut tusarniaassutigineqarpoq. Tusarniaanermut akissutit kiisalu tusarniaaneq pillugu allakkiap Inuussutissarsiornermut Pisortaqarfimmit suliarineqartup nuutinneri Inuussutissarsiornermut Ataatsimiititaliap tiguai.

Suliffeqarfik unnammillertuusoq Sparbanken pinnagu Grønlandsbankip tusarniarnissaa Naalakkersuisut toqqarsimammassuk Inatsisartut Inuussutissarsiornermut Ataatsimiititaliaata tupigusuutigaa.

Aammattaaq inatsisissatut siunnersuummik isummernissaminnut tusarniaaffigineqartut naammattumik piffissaqartinneqarsimanngitsut Inuussutissarsiornermut Ataatsimiititaliaq isumaqarpoq. Tusarniaanermi piffissaliunneqartoq sapaatip akunnerinit tallimanit sivikinnerusariaqanngilaq, pingaartumik KANUKOKA tusarniarneqartunut ilaatigullu. Kattuffiup aalajangiiniartarnera eqqarsaatigalugu allamik aalajangersimasumik isumaqatigiissuteqartoqartinnagu tusarniaanermi piffissaliunneqartut sapaatip akunnerinit tallimanit sivikinnerussanngitsut KANUKOKA-p Namminersornerullutik Oqartussanut arlaleriarluni siusinnerusukkut erseqqissaatigisimavaa.

Matumani inatsit pingaarneq pisariusoq inuussutissarsiornermut annertuumik pingaarutilik pineqarpoq, taamaattumillu tusarniaanermut piffissaliussaq sivikillisinnagu tusarniaaffigineqartut sivisunerusumik piffissalernerqarsimasariaqaraluarput.

Tusarniaanermut sivikinnerusumik piffissaliisoqarsimatillugu nalinginnaasumik nassuiaatini immikkoortup "Pisortaqrarfiit kattuffiillu il.il. tusarniaavigineqarnerat" ataani peruserisatik tamakkiisumik Naalakkersuisut tunngavilersortassagaat Inuussutissarsiornermut Ataatsimiititaliaq naatsorsuutigaa. Tamannali pisimanngilaq.

Nassuiaatigineqartut tunngavigalugit inatsisissamik piareersaalluni suliaqarneq amigaateqartoq Inuussutissarsiornermut Ataatsimiititaliaq isumaqarpoq.

Siunnersuutip Inatsisartunit siullermeerneqarnera.

Inatsisartuni siullermeerineri siunnersuut partiimit Siumumit maannangaaq ilassilluarneqarpoq, partiilli oqaaseqartartuisa sinneri allannguutissanik akissuteqaatinilluunniit itisilikkanik kissaatigineqarlutik.

Tamanna tunngavigalugu Inuussutissarsiornermut, Suliffeqarnermut Inuussutissarsiutinullu Ilinniartitaanernut Naalakkersuisoq akissuteqaammik 15. oktober 2007-imeersumik nassiuusaqarpoq, taanna isumaliutissiisummut matumani pineqartumut ilanngussaq 1-itut ilanngunneqarpoq. § 2, imm. 6 naapertorlugu pisortat maleruagassiaminnik nalunaarutiginnittussaataanerannik apeqqutip Nunatta Eqqartuussivianut suliaassanngortinneqarsinnaanissaa qulakkeerniarlugu inatsisip akuersissutigineqannginnerani ilaatigut allannguutissatut siunnersuummik saqqummiussilersaarnini Naalakkersuisunut ilaasortap allakkiamini ilisimasaarutigaa.

Inuussutissarsiornermut Ataatsimiititaliaq isumaliutigisai.

Suliffeqarfiit inatsisitigut illersugaanerat inatsisissatut siunnersuutip Inatsisartunit siullermeerneqarnerani apeqquserneqarpoq, inatsisiliornermimi tamanut atuuttussatut ilusilerlugit nalinginnaasumik atorneqartartut inatsisissatut siunnersuummi atorneqarmata, soorlu "niuerfinni salliulluni inissisimanermik atonerluineq" (tak. inatsimmi kapitali 3), soorluttaaq unammilleqatigiinneq pillugu

suliassanngortitsinermit uppersaanissamut piunasaqaatit qanoq ittut piunasaqaatigineqarnerat nalornissutigineqarsinnaasoq. Aammattaaq inatsimmi oqariaatsit allat, soorlu "kommunit peqatigiillutik", qanoq eqqortumik paasisariaqarnerat apeqquserneqarsimavoq.

Oqariaatsit pineqartut imarisaat atuuffissaasalu siunertarisaat Inuussutissarsiornermut, Suliffeqarnermut Inuussutissarsiuinullu Ilinniartitaanernut Naalackersuisup allakkamini nassuiaatigai. Nassuiaatit inatsisit qanoq paasineqarnissaannik nassuiaanermi nalinginnaasumik tunngavigineqartartunut naapertuulluartut Inuussutissarsiornermut Ataatsimiititaliamit naammagineqarput.

Inatsisitigut oqariaatsinik tamanut atuuttussatut ilusilikkanik atuineq inatsisit nalornissutigineqarnerannik pilersitsinissaasoq, taamaalillunilu pissusilersorneq inatsisinut naapertuuttuunersoq naapertuuttuunnginnersorluunniit suliffeqarfinit tamakkiisumik qulakkeerneqarsinnaannginneranik inatsisissatut siunnersuummik siullermeerinermit isumaqartoqarnera Inuussutissarsiornermut Ataatsimiititaliamit ataqqineqarpoq. Ataatsimiititaliilli tamanna ernumanartoqartingilaa, suliffeqarfiimmi pissusilersornerminni suleqateqariaatsiminnilu inatsisit nalorninartullit, niuernikkut periaatsit naammaginarumik ingerlanneqarnerisut atorunnaarsinneqarsimanersulluunniit pillugit nalorninermik pilersitsinissaasut ingalassimaniassagaat naatsorsuutigineqarmat. Naalackersuisunut ilaasortap itisiliissutaasumik oqaaseqaatai ima paasineqarsinnaapput; aalajangiinikkut akulerunneq annertunerujartortillugu uppersaanissamik piunasaqaatit sakkortunerulertarnerannik nalinginnaasumik maleruagassaq aqqutigalugu suliffeqarfiit naammattumik illersugaasut.

Unammilleqatigiinnermut Ataatsimiititaliap nalilersuisinnaatitaanerinik peqqissaartumik ingerlatsisinnaanera aammalu Nunatta Eqqartuussiviani misilinneqassagaluarunik attanneqarsinnaasunik naliliisinnaanera Inuussutissarsiornermut Ataatsimiititaliap tunngaviatigut tatigaa.

Aammalu Unammilleqatigiinnermut Ataatsimiititaliami uppersaatinik nalilersuisarnerup missingiikannerluni aammalu ingerlatsinikkut inatsisitigut tunngavigisanut nalinginnaasunut naapertuuttumik pisarnissaa ataatsimiititaliamit akornutissaqarsorineqanngilaq. Inatsiseqarfik matumani pineqartoq uppersaanissamik piunasaqaatinik aalajangersimaqqissaartunik, assersuutigalugu inatsisinik unioqqutitsilluni suleqatigiinnissamik isumaqatigiissutit allanngorlugit pigineqarnissaannik piunasaqaammik atuiiffigissallugu naleqqutinngilaq, niuernikkummi ingerlatsisut siunertaqapiluttut maleruagqusanik taamaattunik atorluaanermikkut inatsimmik qanoq ilillutik avaqqutsinissartik paasilertortarmassuk.

Nakkutilliilluni misissuinerit, tak. §§ 22-24, pillugit maleruagassat akissuteqaammini Inuussutissarsiornermut, Suliffeqarnermut Inuussutissarsiuinullu Ilinniartitaanernut Naalackersuisup nassuiaateqarfigai. Tamanna pillugu maleruagassat ataatsimut isigalugu toqqissisimanartutut Inuussutissarsiornermut Ataatsimiititaliamit isigineqarput, nakkutilliillunimi misissuinerit eqqartuussivimmit akuersissummik pissarsiniaqaarnikkut politiinillu taamatut misissuinerit ingerlanneqartarnerannik

misilittagaqarluartunik suleqateqarnikkut ingerlanneqartarmat. Unammilleqatigiinnikkut oqartussaasut inuit najuuttut pissutsit pineqaatissiissutaasinnaasut pillugit nassuiaateqaqqullugit piumaffigisinnaangilaat, paasiniaallunimi misissuinerit taamaattut politiiit kisimik ingerlassinnaammatigit. Tamanna aamma atuuppoq pineqartup nammineq piumassutsini naapertorlugu akuerisinnaangisaanik kaasarfinnik, taskinik il.il. misissuinerit. Eqqartuussissuserisumut allaqatiginnissutit il.il. misissuinerit ilanngunneqarsinnaangillat uppersaait immikkuullarissuullutik isertuussassaanerit pissutigalugu.

Oqartussaasut *niuernerit tunngatillugu isertugaasunik atortussanillu allanik isertugaasunik* suliarinnittarnerit eqqarsaatigalugu Unammilleqatigiinnerit Ataatsimiititaliap sulianik ingerlatsinera matoqqasumik isertuussilluinnarlunilu pisarnissaa naalakkersuisunut ilaasortap akissummini qulakkeerpa. Taama oqarnerup qularnartoqartinnissaanut Inuussutissarsiornerit Ataatsimiititaliap tunngavissaqanngilaq, tamannami inatsimmi maleruagassanut aamma naapertuummat. Isertuussinissamik piumasaqaatip kingunerissanngilaa Unammilleqatigiinnerit Ataatsimiititaliap ingerlatsinerata allaffissornikkullu periaasiisa tamanut saqqummiunneqarsinnaanginnissaat, tamannami pillugu ilisimatitsissuteqarneq suliffeqarfiit pineqartut niuernerit tunngatillugu isertugaatimik il.il. illersorneqarnissaannik piumasaqaataannik saneqqutsinani pisinnaammat.

Ingerlataq tapiiffigineqartoq inuussutissarsiutaanngippat *pisortat sulisartut peatigiiffinut tapiissutaat* inatsimmi aallaaviatigit ilaatinneqanngitsut Inatsisartut Inuussutissarsiornerit Ataatsimiititaliaata maluginiarpa. Pisortanit tapiissutit, tassa *pisortat maleruagassiaat naapertorlugit tapiissutit*, unammilleqatigiinnerit equititsisutut inatsimilluunniit unioqqutitsisutut isigineqarsinnaanersut siullertut Naalakkersuisunit aammalu kommunini nakkutilliinikkut oqartussaasunit aalajangiiffigineqartarput, taakkulu aalajangiinerit Unammilleqatigiinnerit Ataatsimiititaliamut tamatumalu kingorna pisariaqassappat Nunatta Eqqartuussivianut suliassanngortinneqarsinnaavoq, tak. inatsimmi kapitali 4 aamma 8.

Taamatut aaqiineq naammaginartutut ataatsimiititaliamit isigineqarpoq, inuussutissarsiutinimi arlalinni tapiissutitigut aaqqissuussinerit suli pinngitsoorneqarsinnaanginnerat nassuerutigineqartariaqarpoq, aningaasalli inuussutissarsiornermik ingerlataqartunut suliffeqarfiulluunniit tapiiffigineqartup unammillertanut innarleeqqunagit eqqortumik atornerarsut toqqissimanartumik nakkutigineqartariaqarpoq.

Aammattaq maannamiit pisortat inuussutissarsiornikkut ingerlataannut inatsit aamma atuutinneqalissasoq naalakkersuisunut ilaasortap akissummini erseqqissarpa, tamannalu inatsimmut atuuttumut sanilliullugu nutaartaavoq. Pisortat inuussutissarsiornikkut ingerlatsinermi namminersortumik ingerlatsisunut sanilliullutik unammilleqatigiinnikkut iluaqutissaminnik qulakkeerinnginnissaat allannguutikkut qulakkeerneqarpoq, tamannalu Inuussutissarsiornerit Ataatsimiititaliamit ilassilluarneqarpoq.

Inatsisip atuutsinneqalerneranut atatillugu unammilleqatigiinnikkut oqartussaasut paasititsiniaanermik anenrtuumik aallartitsilersaernerat Inuussutissarsiornermut Ataatsimiititaliamit nuannaarutigineqarmat naggasiullugu oqaatigineqassaaq, taamaaliornikkut unammilleqatigiinneq pillugu inatsisip nutaap qanoq kinguneqarnissaa maleruagassallu suut suliffeqarfinit malinneqassanersut pillugu innuttaasut nunatsinnilu suliffeqarfiit sukumiisumik ilisimatinneqarsinnaaqqullugit. Inatsisip inuussutissarsiornermik ingerlataqartunut malunnaateqartumik kingunerisassai, tassunga ilanngullugit nalunaaruteqarnissamut paasissutissiinissamullu pisussaaffiit, eqqarsaatigalugit taamatut suliniuteqarnissaq pissusissamisoorpoq.

Ataatsimut naliliinerup kingorna unammilleqatigiinneq pillugu inatsisip nutaap nangaanartoqartinnissaanut Inatsisartut Inuussutissarsiornermut Ataatsimiititaliaat tunngavissaqarsorinngilaq. Unammilleqatigiinneq pillugu inatsimmut maanna atuuttumut sanilliullugu allannguut pingaarnerpaaq tassaavoq nakkutilliinermik tunngaveqarnermit inerteqquteqarnermik tunngavimmut ikaarsaariarneq. Allannguutikkut tassuuna unammilleqatigiinneq pillugu inatsit nunani killerni inatsisit taamaaqqataannut nallersuuttunngortinneqarpoq. Tamatuma peqatigisaanik naak sakkortuumik unammillertoqaraluartoq suliffeqarfiit unammillertiminnut naapertuilluartumik nammineq piumassusertik malillugu pissusilersornissamut annertuumik kaujumissuseqalernissaat pilersinneqassaaq.

Inuussutissarsiornermut Ataatsimiititaliap inassuteqaataa.

Siuliani allassimasunik oqaaseqaateqarluni siunnersuut saqqummiunneqarnermisut iluseqartillugu akuersissutigineqassasoq Inuussutissarsiornermut Ataatsimiititaliap isumaqatigiittup inassutigaa.

Taama oqaaseqarluni Inatsisartut Inuussutissarsiornermut Ataatsimiititaliaata siunnersuut Inatsisartunut aappasaaniigassanngortippaa.

Emilie Olsen
Siulittaasup tullia

Esmar Bergstrøm

Vittus Mikaelson

Doris Jakobsen

Lene Knüppel

Ilanngussaq